


P I C T A V I A,

vulgo

P O I C T O V.

Termini.

Regionis
indoles.Metropolis
Pictavi.

Pictonum Provincia, vulgo *Poitou*, fines habet versus Septentrionem Britanniam & Andegaveses: versus ortum Turones, Bituriges, & Lemovices; versus Meridiem Sanctones & Angolismenses: versus Occasum denique Oceanum. Complectitur 1200 Parochias sub tribus Episcopatibus, Pictaviensi, Malleacensi, & Lucionensi. Regio est frugum, pecorisque, lanæ, linique feracissima: vino frumentoque dives; piscium abundans: avium ferarumque copiosa nutrix. Viperæ confectioni theriacæ utiles in hac regione & imprimis in rupibus & dumetis circa metropolim inveniuntur; quarum numerum ingentem pharmacopolæ Venetiæ sæpe ablegare solent. Eleganti satis sunt ingenio incolæ, sed maxime Pictones; nam jocos serunt cum quadam dexteritate: ruricolæ autem sunt astuti, & si verum dicendum est, improbi; quibus qui parum fident, sapere perhibetur. Nobiles strenui, providi, audaces. Veteres populi fuere *Pictones*, Cæsari, Straboni & Plinio memorati. Metropolis hujus provinciae est Augustorium vel *Pictavium*, vulgo *Poitiers*, urbs vasto ambitu porrecta cli- voso montis dorso insidet, & præruptis collibus undiquaque cingitur, intermedia angusta valle, ex quibus intus in urbem despectus est, ita ut sclopetarii ad angulum urbis imo loco citra periculum in urbanum militem jaculari possint. Tantum ad portam, Valli vulgo dictam, plantitie spatiosa excipitur. Antiquitatibus suis superbit, arce valida: palatio Gallieni: vastis amphitheatri ruderibus, vulgo *Les Arenes*; aquæductuum fornicibus. Academiam habet florentissimam, cui alter post Parisiensem locus solet tribui, institutam à Carolo VII Francorum Rege, anno 1431. Templum hic est structuræ magnificæ ex lapide quadrato durissimo, D. Petro sacrum: à D. Martiale primum, sed non tam augusto opere excitatum. Aliud est B. Virgini dicatum in foro magno, quod vocant, *Nostre Dame la grande*: uti & illud in superiore urbis parte D. Hilario sacrum. Inter Ortum & Meridiem Clanius *Le Clain* è Lemovicibus descendens pedem clivi alluit, & porta Valli ad lævam relicta, per canales divisus, insulas quasdam non minus amœnas, quam oppidorum usibus utiles efficit, & infra vallum ad Cypriani Fanum rursus

Gallia.

funditur, parte alvei secundum muros urbis, longius fluente, quæ tandem ad Ioberti pontem jungitur, & pratum Abbatissæ vulgo dictum prætervectus inter Rupirolium & arcem triquetra forma olim à Ioanne Biturigum Duce, Caroli V fratre constructum exit. Dein haud longe à Castro-Eraldi Vigennæ miscetur. Ultra arcem suburbium S. Lazari porrigitur in imo urbis loco. Inde ad Hilarii fanum Septentrioni & Occasui objectum pars superiore non minor extenditur, cujus muris stagnum, vulgo *Sant Hilarianum* dictum, subjacet, ponte, cui Archardo nomen, divisum, ex quo sursum enitendo ad Valli portam ascenditur.

Reliqua oppida sunt; Nyortium munitum oppidum, & nundinis toto Regno maxime famosum, ad Suram amnem situm, qui inde navigabilis per Almetensem agrum decurrens supra Maranum in mare exoneratur, alius ab eo, qui ex Gastinensis regionis stagnis ortus, silvam vicinam permeat, & Pomeræi ponte junctus per Mortanium & Clissonem labens ad Condivicium Nannetum Ligeri mergitur.

Fontenæum Comitum ad Vandellam amnem situm oppidum cum arce, sed invalida.

Lusignanum quinque ab Augustorito leucis, arcem habet saxo undique prærupto & lato impositam; qua extra urbem prominet, duplici muro firmissimæ structuræ ac crassitudinis circumdatur, ut à tormentorum ictibus nihil aut parum labefactetur; ad hæc fossa admodum profunda, ut quanquam ex collibus imminenti- bus in eam despectus sit, difficillimo accessu ad- eat: qua oppidum respicit, triplici muro ac duplici fossa cingitur. Reliqua sunt, *Montmorillon*, *La Basse Marche*, *Dorat*, *S. Maixan*, *Sivray*.

In eadem Pictonum Provincia est Principatus Talmon. Talmundus oppidum (inquit *Maf- son*) in sublimi collocatum promontorio mari imminet; qua vero parte tellus continenti ad- hæret, excisum est promontorium, adeo id ma- re circa id oppidum ob æstum influentem & resluentem locum natura munitum, arte mu- nitissimum reddidit; isque locus portum habet conventu mercatorum celebrem: & Rupisurio- nensis præterea Ducatus Eraldi-Castrensis. Ejus oppidum Castrum-Eraldi, vulgo *Chastelleraut*, urbs in plano jacet, muro debilis, nec satis pro- funda fossa vallata aut pomœrio firmata, ad Vigennam, cui & pontem impositum habet. Verum inter murum & domos oppidi spatium, licet vacuum, interjacet.

Item Vicecomitatus de *Thours*, quem ho- die

O O